

Txinako Gobernua giza eskubideez hitzegiteko prest dago

PEKIN

Txinako Gobernua giza eskubideez hitzegiteko prest azaldu da James Baker EEB-Betako Estatu idazkariak nazio hura bisitatzeko astebete baino geratzen ez denean. Txinako Atzerri Ministeritzako bozeramale batek adierazi zuenez, «alor horretan ezadostasunak egotea ez da harritzekoa, sistema sozialak desberdinak bait dira».

Amnesty International (AI) giza eskubideen aldeko erakundeak Bakerren bisitaz baliatu da Txinako agintarien jokabidea salatzen. AIk dioenez Tibet nazionalisten kontrako errepresio zorrotza eragiten ari dira Pekinako agintariek. Giza eskubideen aldeko erakundeak adierazi duenez, ehundaka monje budista atxilotu dituzte Tibetean.

AIk Lhapka Tsering gazte tibetarrak jasandako torturak salatu ditu. Gazte horrek 20 urte zituen Txinako soldaduek Tibet eskualdearen independentzia aldarrikatzeagatik atxilotu eta hil zutenean. Wan Juntao eta Chen Zimin-i 1989. urtean ikasleen protestatan parte hartzeagatik 13 urteko gartzela zigorrak ezarri zitzaizela ere azaldu du Amnesty Internationalak.

Txinako Gobernuak Estatu Batuen aurrean «protestatu nahi du» nazio horretako Estatu Departamenduko dokumentu batean Tibet Txinak okupatutako lurraldea dela esaten delako.

EEBBek hauteskunde libreak nahi dituzte Zairerako

WASHINGTON

Estatu Batuetako Gobernuak Mobutu Sese Seko, Zaireko lehendakariari eskatu dio oposizioari Gobernua osatzen uzteko hauteskunde libreak egin ditzaten, eta Estatu horrek bizi duen krisi ekonomiko eta politikoari aurre egin ahal izateko. Horrela adierazi zuen atzo Gobernu iparramerikarreko goi funtzionari batek.

Eskaera ofizialki Zaireko enbaxadore iparramerikarrak egin dio Zaireko lehendakariari, herenegun Kinshasan Mobutu Sese Sekorekin izan zuen elkarrizketan. EEBBek Zairen Konferentzia Nazionala osatzea nahi du. Konferentzia Nazionalak antolatuko lituzke aurki izango hauteskundeak.

Dena den, EEBBen politika Zaireri dagokionez, Frantzia eta Belgikarekin batera koordinatuta egingo da.



Ekialde Erdiko Bake Konferentzia

Autonomia prestatzeko batzordeak osatu dituzte jada palestinarrek

Lurralde okupatuetako balizko administrazio aldaketarako aurreratu dira

Lurralde okupatuetako palestinarrek batzorde tekniko bereziak osatu dituzte, balizko autonomia eskuratuz gero prestatetako egiteko. 'Yediot Ajronot' egunkari independenteak luze eta zabal emandako berria da, baina Israeleko beste egunkari eta komunikabide askok ere aipatu dute notizia. Palestinarrek autonomia berehala izango dutela uste dute.

JERUSALEM

Agintari militar israeldarrek Gazzah eta Zisjordaniako lurralde okupatuetan egiten dituzten funtzioak betetzeko administrazio palestinarra osatzeko batzordeak sortu dituzte, hain zuzen. Palestinaren Askatasunerako Erakundeak (PAE) Estatu palestinar independentea osatzeko bidean autonomia erdibide gisa onartu zuenean hasi ziren eratzten batzorde horiek.

'Yediot Ajronot' arabera, batzorde berezi horiek lurralde okupatuetako gobernu militarrei beren funtzionamenduari buruzko informazioa eskatu diete. Baina hauek oraindik ez diete informazio hori eman, Gobernu israeldarren baimenaren zain daudelako.

Ziad abu Ziad abokatu eta buruzagi palestinarren hitzak ere biltzen



Lurralde okupatuetako palestinarrek autonomiari heltzeko prest daude.

ditu egunkari independenteak. Ziad den hitzen arabera, batzordeak adituek osatzen dute, eta ura, errefuxiatuak, lurrak eta ekonomiari buruzkoak dira. Adituen afiliazio politikoa ez dela kontutan hartu adierazi zuen Ziadek.

Agintari palestinar horiek zehaztu zuen adituek Israelekin aldebiko negoziaketetan parte hartuko duten palestinarrei lagunduko dietela.

**ASTEBETE
BERRIRIK
GABE**

Ekialde Erdiko Bake Konferentzia hasi zenetik astebete iragan ondoren, Israelek oraindik ez ditu herrialde arabiarrekin harremanik izan aldebiko elkarrizketari berrekiteko,

Yitzhak Shamir lehen ministroaren inguruko iturriak aipatzen dituen 'Jerusalem Post' egunkariak adierazi duenez.

Israelek nahiago du elkarrizketa horiek partehartzaileen herrialdeetan egitea, baina Ekialde Erdiko beste herrialde batzuetan egiteari ez lioke uko egingo. Turkia eta Txiprek beren lurraldeetan egitea ere proposatu dute aste honetan. Aldebiko bilera egiten denean, palestinarren ordezkariak neurri batzuk planteatuko dizkie israeldarrei bi aldeei konfiantzazko giroa sortzeko, Nabil Shaat-ek, Yaser Arafat PAEko buruzagiaren aholkulari politikoak adierazi zuenez.

Arafat Siriako agintariekin bildu da konferentziako bilerak prestatzeko

DIMAXK

Jordaniako Husein erregearekin izan ondoren Yasser Arafat Palestinako Askapenerako Erakunde (PAE) liderra, Siriako hiriburura joan zen. Palestinaren liderrak Siriako Atzerri ministroak, Faruk al Sharaa-k, Madrilen ordezkari izan zirela zuzendu zion hitzaldia goraipatu

zuen. Arafaten ustez siriarrak Israeleko Gobernuaren «harrokeriari aurre egin diote». «Faruk al Sharaa Atzerri ministroaren hitzaldiak nazionalista arabiarrek defendatutako jarreraren balioa erakutsi du», esan zuen lider palestinarrek.

Arafat eta PAEko Komite Exekutiboko zenbait partaide Dimaxkera heldu ziren Jordaniako erregearekin



Yasser Arafat Hussein errege jordaniarrekin ere elkarrizketatu zen.

egon eta gero. Palestinarrek eta jordaniarrek jarrera bateratua defendatu nahi dute aldebietako bileretan israeldarren aurrean. Siria bisitatu ondoren Arafat Egiptora joango da Hosni Mubarak lehendakari egiptiarrarekin egoteko.

Lider palestinarra eta Hafed el Asad lehendakari siriarrak Madrileko konferentzia hitzegingo dute. Palestinarrek aurrerantzean nazio arabiarrek israeldarren aurrean defendatuko dituzten tesien berri izan nahi dute, jarrera bateratua defendatu ahal izateko.

Mubarak egunkari israeldar bati egindako adierazpenetan zioenez, asmo ona edukiz gero, Ekialde Erdian behin-betiko bakea ezartzeko urtebete nahikoa izango da.

Palestinako Kontseilu Nazionalako lehendakariak esan zuenez Estatu Batuek konferentziaren hurrengo faseetan erakutsiko dituzte beren benetazko asmoak. Abdel Hamid Al Shaidek adierazitakoaren arabera, aurrerantzean egingo diren aldebietako bilerak Gobernu estatubatuararentzat proba gogorra izango dira.

LABURREAN

VENEZUELAN istiluak polizia eta ikasleen artean

Venezuelan ikasleek borroka gogorak izan dituzte bertako Poliziarekin. Ikasleek garraio publikoaren salneurriek izan duten gorakada dela eta protesta ugari egin dituzte Venezuelako hiriburuan, Caracasen. Azken manifestaldietan zauriturik izan ez bada ere, dagoeneko bi polizia eta ikasle bat hil dira azken hilabetean izandako istiluetan. Gaur greba orokorra egingo da Caracasen garraioen salneurriengatik protestatzeko.

KUWAITEN petrolio putzu guztiak itzalita

Irakeko Armadak Golkoko Gerran Kuwaiteko 610 petrolio putzuei su eman bazien ere, espero zen baino epe laburreagoan guztiak itzali dituzte. Irakiarrek 725 petrolio putzu sabotatu zituzten eta horietatik 610 su hartu zuten. Kuwaitek bere historiako hondamen ekologiko handiena izan du eta zenbait egunetan ez zuten eguzkiaren argirik ikusi petrolio putzuko kea zela eta. Kuwaiteko Gobernuak adierazi duenez, irakiarrek 70.000 milioi dolarretako kalteak eragin dituzte emiratoan.

HEGO Afrika eta Ukrainia harremanetan

Roelof Botha Hego Afrikako Atzerri ministroa Ukrainiako agintariekin bildu zen bi nazioen arteko aldebietako harremanak ezartzeko. Ukrainiako Atzerri eta Ekonomia ministroak Botharekin bildu ziren. Atzerri ministro hegoafrikarrak adierazi zuenez, bi nazioen artean izango diren harremanak finkatzeko abenduaren 1ean Ukrainian egingo den independentzia erreferenduma pasa arte itxaron beharko da.

MAXWELL bihotzekoak jota hil zitekeela diote forentseek

Luis Gutierrez epaileak adierazi duenez, autopsiaren lehen emaitzen arabera, Robert Maxwell prentsa enpresaria bihotzekoak jota hil zitekeen. Dena den, autopsia egin duten arduradunak zenbait analisien zain daude eta oraindik ezin dezakete ziurtatu Maxwell itota hil zen ala uretara erori zenean ordurako hilik zegoen. Maxwellen gorpua laster bidaliko dute Erresuma Batua.